

四庫全書

史部

欽定四庫全書

史部

皇朝文獻通考卷七十二

內閣中書_臣寶汝翼覆勘

總校官中書_臣孫溶

欽定四庫全書

皇朝文獻通考卷七十一

學校考九

直省鄉黨之學三

雍正十三年九月

皇上初登大寶

恩詔各省入學額數大學加七名中學加五名小學加
三名

吏部奏請

欽點各省學政奉

上諭各省學政有訓導士子校閱文藝之責關係甚重
非才守兼優素有學問者不克勝任朕即位之初於
諸臣之才學品行未能深知難以降旨簡用著大學
士尚書侍郎於翰詹科道部屬內各據所知保舉一
二員開列送部彙奏請旨

加給各省教官品級先是直省教職未入流品至

是奉

上諭各省教職乃師儒之官所以訓迪約束為多士之表率也若不能給品秩則與雜職無異恐本人遂以冗散自居不知殫心課士以盡職任其應如何加給品級以示鼓舞責成之意著吏部議奏尋議准京府教授四氏學教授各府衛儒學教授為正七品官各州學正各縣教諭為正八品官各府州縣衛訓導為從八品官

更定河南陳州府學許州學及新設淮寧石梁二
縣學廩增生員各額數陳州許州各設學照例各
取進文童二十名武童二十名廩增各額設四十
名自乾隆元年歲考為始新設淮寧石梁二縣學
並取進文武童生各十五名額設廩增之處仍照
縣學例

定貴州苗學及廩增額數新進苗生大學五名中
學三名小學二名均附各學肄業苗籍廩增大學

各三名中小學各一名

更定山東益都縣及分設博山縣各學文武生員
額數益都文童取進十五名武童取進十二名分
設之博山縣照小學例取進文武童生八名

令黔省畢節縣屬之赤水河北地方童生撥歸永
寧縣籍者統歸川省考試不得兩地冒考赤水河
北地方應考儒童自永邑歸川之後即赴永寧考
試入學已逾三年而文武生員歲科兩試仍赴黔

省隔省多有未便故有是令

定粵省各衛所屯軍籍童生照直隸河間等衛裁併歸縣考試例以軍籍童生額多人少且軍民兩籍混冒控訴不已也凡各衛所屯軍籍童生一併歸入現在住居辦糧之州縣民籍內應試

乾隆元年

命免舉貢生員雜色差徭是時各省有令生員充當總甲圖書之役者奉

上諭嗣後舉貢生員等著槩行免派雜差俾得專心肄業倘於本戶之外別將族人借名濫免仍將本生按律治罪

又

恩准直省抗糧續完未清遇蠲之革生仍予開復定例士子倚恃青衿抗欠國課者褫革追比至革後清完者仍予開復先是

上初登大寶

恩詔將直省所有雍正十二年以前舊欠錢糧俱行豁免至是復

念革生内容有所欠錢糧亦已陸續完納祇緣尾欠未清未曾循例開復而所欠又奉豁免之

恩詔遂令所革衣頂永無開復之期情殊可憫

特諭各省督撫轉飭各州縣查明開復俾得改過自新並將姓名登記檔冊倘將來再有抗欠著該督撫嚴叅治罪

增定

恩詔加廣奉天等處滿合字號及遼陽州儒童入學額
數禮部奏准奉天府學滿字號照中學例加五名
錦州府學復州學合字號照小學例加三名其遼
陽州等學原額七名五名者加額二名四名二名
者加額一名舉行一次不著為例

敕各省通行

御纂諸經并

諭士子誦習成熟者聽學臣考試優錄先是

聖祖仁皇帝御纂周易折中尚書彙纂詩經彙纂春秋彙纂等編及朱子全書性理精義諸書頒行直省

世宗憲皇帝敕直省布政司敬謹刊刻准士子赴司呈請刷印嗣各省士子以赴司遞呈必俟批發既多守候且一生所請不過一部不能特為發板開刷是以刷印寥寥至是

特諭直省撫藩諸臣加意招募坊賈人等聽其刷印通

行嚴禁胥吏阻撓需索之弊

諭各省學臣每科歲按臨時預飭各該學確訪生童中

有誦讀

御纂諸經者或專一經或兼他經開明冊報俟考試文藝
之後該學政就四經中斟酌舊說有所別異處摘取
數條另期發問只令以義條答不必責以文采有能
答不失指者所試文稍平順童生即予入泮生員即
予補廩以示鼓勵

又

欽頌

聖祖仁皇帝御製律書淵源於直省學宮并令禮部招募
坊賈刷印聽其翻刻

定廣東改隸府州各縣取進文武童生額數嘉應
州屬之興寧長樂二縣前隸惠州平遠鎮平二縣
前隸潮州至是四縣改屬嘉應州轄將惠州府學
文武童生各減三名歸興寧長樂二縣潮州府文

武童生各減二名歸平遠鎮平二縣撥入州學其
嘉應州武童原額止十二名取進原未加增准於
潮州府學武童內再減二名撥歸嘉應州學又連
州改為直隸州學額進八名准再於廣州府學內
撥取文童一名歸連州學

定河南復設南名縣學廩增生員增額照中學例
文武入學各額取十二名廩增各額設二十名

更定廣東普寧潮陽二縣學取進文武童生額普

寧縣文童取進十名武童九名潮陽縣文童十八名武童十四名

定陝西同州府縣各學廩增生員各額時改同州為府歲科兩考取進文武童生各二十名廩增各四十名大荔縣學取進文童二十名武童十五名廩增各二十名原減西安府額內撥歸白水朝邑蒲城三縣之文童三名仍歸西安府學定額取進文武童生各二十名

定湖北新設宜昌府縣各學廩增生員各額數府學額取文武童生二十名廩增各四十名夔陵州改為東湖縣准照州學原額取進文武童生十五名廩增各二十名

嚴定貢監生員包攬錢糧例侵收入已者革去衣頂照常人盜倉庫錢糧律并贓論罪係八十兩以上照不應為而為之律杖八十仍斥革如不及八十兩以上仍照攬納稅銀杖六十之例定擬收贖

奉

上諭書院之制所以導進人才廣學校所不及我

世宗憲皇帝命設之省會發帑金以資膏火恩意至渥也

古者鄉學之秀始升於國然其時諸侯之國皆有學
今府州縣學並建而無遞升之法國子監雖設於京
師而道里遼遠四方之士不能胥會則書院即古侯
國之學也居中講習者固宜老成宿望而從遊之士
亦必立品勤學爭自濯磨俾相觀而善庶人材成就

足備朝家佐使不負教育之意該部即行文各省督撫學政凡書院之長必選經明行脩足為多士模範者以禮聘請負笈生徒必擇鄉里秀異沉潛學問者肄業其中其恃才放誕佻達不羈之士不得濫入書院中酌倣朱子白鹿洞規條立之儀節以檢束其身心倣分年讀書法予之程課使貫通乎經史有不率教者則擯斥勿留學臣三年任滿諮訪考核如果教術可觀人材興起各加獎勵六年之後著有成效奏

請酌量議叙諸生中材器尤異者准令薦舉一二以示鼓舞

又

上以各省學政有衡文育材之責人文繁盛應試衆多者莫如江南而江南學政養廉江蘇二千兩安徽一千五百兩較他省為少以此養贍家口延致幕客未免不敷

特諭從今秋後為始上下兩江學政養廉各賞銀四千

兩使伊等用度從容益得盡心於職業以副朕任官課士之至意

更定舉報優劣例定例學政歲科二試並行舉報優劣於三年任滿彙題至是改定於歲試時隨場舉報優劣一次造冊送部仍俟任滿彙題從前科試舉報之例停止

停止五生互結之例先是嚴禁生監抗糧唆訟行止有虧令各該學教官歲底責取各生甘結以五

生互結為例至是部議生監並隸黌宮如有不法該學自可詳革若惟以五生互結為憑良善者固氣類相投不肖者豈不能朋比掩飾應將互結之例停止從之

禁地方官擅行斥責生員凡生員偶有過愆止應戒飭者地方官會同教官在明倫堂扑責有擅自叱呵斥責者聽學臣察叅以違例處分其有肆行不法等事該地方官察稟即行申詳督撫學臣革

退審理如挾私妄報者照例叅處

令順天府尹脩葺義學飭大興宛平二縣清理義學舊址酌量脩葺慎選文行兼優之士延請為師不論鄉城老幼願就學者皆聽肄業其中有貧乏無力者酌給薪水其脩建學房師生膏火需費統於存公銀內奏請動撥

飭黔省設立社學禮部奏准黔省地處偏僻其有未經設立社學之處令該督遵照雍正元年定例

飭令州縣官酌量舉行

更定月課三次不到者詳革之例定例月課不到者戒飭三次不到者詳革至是改定三次不赴課者該學教官嚴傳教飭其有並無事故終年不到者詳請褫革

二年禁止各學教官率領文武生員迎送官司之習

減定河南南陽縣學廩增額數原設廩增各三十

名至是減去十名以是時分設南名縣別設廩增故也

增設山西朔平寧武等處各學廩增額數原設廩增二十名時以政府已久人文漸盛議准照州學例各加十名神池五寨二縣學與寧武縣均設廩增各二十名

是年冬初制臺灣試院巡視臺灣給事中兼理學政單德謨奏稱臺灣考試生童向來未建考棚止

就海東書院之便而地方湫隘難容遂別開門徑
通

文廟戟門外塔蓋棚殿未免雜沓喧囂鄰於褻慢且
慮闕防不容易滋弊端請照內地之例建立考棚
以昭嚴肅得

旨向因臺灣應試人少故未建立考棚今人文日盛生
徒衆多著該督撫轉飭地方有司相度地方情形脩
造試院俾宮牆肅靜考試謹嚴以重造士育才之典

定安徽潁州府縣各學取進生童額數潁州學升
為府學取進童生二十名新設阜陽縣學取進十
五名

定奉天永吉州學取進生童額數長寧縣裁歸永
吉州額進童生四名

三年定賑給貧生例定例各省學田銀糧原為散
給各學廩生貧生之用但為數無多或地方偶遇
歉年貧生不與貧民一例散賑至是奉

上諭凡遇地方賑貸之時著該督撫學政飭令教官將貧生名籍開送地方官核寔詳報視人數多寡即於存公項內量撥銀米移交教官均勻散給資其饘粥如教官開報不寔給散不均及為吏胥中飽者交督撫學政稽察即以不職叅治

嚴直省教官勒索生員贄儀舉報優劣不公之罰
照借師生名色私相餽送例革職

申嚴優生改行之條凡優行生員如舉優注冊之

後該生改行易轍寔有劣蹟可指者該府州縣官
及教官仍應據實申詳該學政咨部黜革

改甘肅蘭州學為府學狄道縣學為州學新設皋
蘭縣學府學取進童生二十名狄道十五名皋蘭
十二名

定湖廣慈利永定二縣學廩增額數慈利各十四
名永定各十二名

定湖南沅州府縣等學廩增及取進童生各額數

沅州升府所屬祇三縣府學廩增仍照州學例各
三十名府學取進童生十五名芷陽縣學十五名
苗童三名

又增定廣東嘉應州廩增額數舊額各二十名至
是加十名

停止外省入籍廣西考試例先是粵西本地應試
者少准令各省及本省異府之人入籍考試至是
冒籍紛紛有妨土著議准停止

四年

上以浙江數文書院生童衆多每歲帑金租息銀僅四百餘兩不足以敷餼廩

特命加賜帑金一千兩交與該撫經理定取息銀以資諸生膏火

增定貴州南籠府學廩增各額數廩增各三十名
取進童生各十二名

增定廣東商籍廩增各額數照直隸天津府學例

設商籍廩增各十五名撥附廣州府學

又定申嚴劣生聚衆抗官之律時各省劣生有聚衆抗官者奉

上諭朝廷之所以優待士子者以其讀書明理立品脩身足為庶民之坊表且備登進之選為國家有用之材也今則特列膠庠藐視憲典以安分為恥以抗法為榮平時號為讀書明理者尚且如此愚民無知羣相則倣其為風俗人心之害何可勝言且此等人伏

處牖下即不自愛將來倖登仕籍必至乖戾縱肆傲
上虐民尚望其慎守官方砥礪廉隅為國家循良之
吏乎古稱稂莠不剪則嘉禾不生朕之嚴斥劣生者
正所以培植端人正士也各省學政當深知此意時
時訓誡俾頑劣生童改行率德以受國恩其蕩闊踰
檢有玷宮牆者即行黜革毋得姑容督撫大吏亦當
極力化導嚴加約束以端士習而厚民風著將此旨
刊刻頒布咸使聞知尋刑部等衙門議准除聚眾抗

官按首從分別治罪外凡童生於臨考時不待聯
謀羣相萃集或偶與市民爭訟輒喧播觀者雖未
有不法情事實屬囂凌陋習令學政分別革懲俾
知畏法自守

定直省生員補行歲考之法凡欠考各生挨次補
考者學臣於彙報歲科冊內分別詳註如有將數
次只補一次及徑行附等之處咨部者照徇情例
議處

定雲南宣威州學廩增額數仍照縣學例廩增各二十名

定直隸撫寧縣學及新設臨榆縣學廩增額數撫寧縣學取進文童十八名武童十五名其新設之臨榆縣學設廩增各二十名取進文童十五名武童十二名

定福建霞浦分設之福鼎縣廩增各額數霞浦福鼎每學廩增各十名取進童生霞浦八名福鼎

七名

定廣西泗城鎮安等府各學廩增額數泗城鎮安俱設廩增各四名歸順州學設廩增各二名

定湖北宣恩來鳳利川咸豐四縣取進童生額數四縣各酌取二名暫歸恩施縣學

定雲南威遠土州改隸鎮沅府取進童生額數前附考元江府於元江府加額二名至是改隸鎮沅將加額二名撥歸鎮沅府學

定各省拔貢生應試經解例學政考試拔貢將

御纂諸經中摘取先儒異同之說令其條分縷晰詳對一

道解部

定各省舉報優生注明經解例除將實行注冊外
乃將通曉何經或五經或三經並行注明將考試
經義一道一併解部磨勘

五年定廣東新設之豐順縣廩增各額數廩增各
二十名取進童生八名

增定浙江長興蕭山二縣學取進童生額數照府學例取進二十五名

增定福建永春州德化縣各學取進童生額數永春原額十五名至是增三名德化原額十四名至是增四名

定陝西樂山三臺二縣學廩增各額數樂山三臺原繫州學額設廩增三十名後改縣學廩增尚仍其舊至是樂山升嘉定府三臺升潼川府均酌撥

縣學三十名之十名歸入府學餘仍留縣學其兩
府學取進童生額設各十五名

六年

上以近來教職多衰老庸劣不但不能以道德禮義化
導齊民並課士之職亦不克舉

特諭督撫會同學政嚴飭所屬教官務以實心實力勸
學興文恪盡課士之責其有年力衰頽貪戀祿位及
庸劣無能不稱師儒之席者秉公甄別咨部罷黜

七年

上以粵東俗尚澆漓每遇生童齊集考試之時或赴攤
鋪短價強買什物或與市人扭結稟官稍不遂意
即恃衆喧囂挾制罷考地方有司視以為常每多
寬縱至是石城電白等縣考試武童有不遵禮教
之武生恃衿抗法事

聞

特諭該督撫學政董率有司教官嚴切訓諭務令士子

等洗心滌慮痛改前非倘冥頑不靈仍不率教即按
律懲治不稍寬貸如官員等有徇隱姑縱者一經查
出定行分別處分

又

命剔除直省童生營私入學之弊時江西巡撫陳宏謀
奏江省積棍每年尾隨學臣按臨各郡假冒學臣
親戚內幕哄誘士民營求入學講定謝儀若干面
同包封仍存士民之手俟案出有名方來取銀營

求之人見其不先取銀以為有益無損遂將銀兩付伊包封畫押棍徒預用錢文假作銀封臨時同夥設計掩飾調換銀兩潛逃名曰掉包迨至案出無名士民啟視銀封方知墮計而棍徒早已遠颺此風各處多有不能杜絕

上以一省若是他省諒亦相同

特諭各該督撫等於學臣按試之前將此等掉包串騙之弊詳明曉諭凡有指稱營求考取將銀封貯出案

收取者無論真假立即嚴拿究處並許被騙之人報官查拿則應考生童識破機關自不致墮其術中而棍徒知有法紀亦不敢公行無忌亦肅清學政之一端該部即遵諭行

又左都御史劉統勳等奏考試拔貢公同校閱分別進

呈其山西毛清奇誤認題旨不准拔貢奉

上諭山西毛清奇不准拔貢發回本學肄業該學政交

部嚴加議處夫拔貢乃造就人才之典今所取淺陋
若此何以振起文風司衡鑒者不得辭其責嗣後務
矢公慎遴選出衆之材以鼓勵多士毋得苟且塞責
自干嚴譴

定貴州永豐州學廩增額數自雍正十二年建學
至是設廩增各二名

定江西改土為流之各土司子弟准照湖廣苗徭
例入籍考試

更定河南許州學取進童生額數許州府改為直隸州取進童生仍照府學二十名

八年申定選取樂舞生之例先是五年定府州縣學樂舞生每學例用六佾額設三十六名外加四名以備事故更替各州縣考選本籍俊秀通曉音律嫻習禮儀者充補每遇學臣按臨免其府縣兩試由教官冊送府縣敘入考案之後申送院試憑文錄取至是更定各州縣於與考童生內畧知文

義者取具隣族甘結會同選官選補送學臣察覈
至學臣按臨時飭令提調官按名考驗實係應試
儒童畧知文義者方准充補若係目不識丁者即
詳明黜革別行選取仍將濫選州縣學官察參議
處

申定考試童生覆試仍用小學論題例康熙三十
六年定例考試童生用小學論三十九年改用性
理太極圖說通書西銘正蒙一併命題四十五年

仍定用小學論雍正六年改定論題用孝經乾隆
元年定論題一道孝經與小學兼出至是復定各
省學政歲科兩試及府州縣試於覆試時用四書
題作時文一篇外仍用小學命題作論一篇必通
曉明順方准錄取

增設安西衛教授一員甘肅口外安西沙州靖逆
柳溝赤金五衛生員向隸肅州學至是以去肅千
有餘里稽察難及改定於五衛適中之安西衛增

設教授一員管轄

九年

命各省州縣考取童生送院應試者不必拘定額數舊
例州縣考取童生送學政衙門考試定有額數康
熙三十九年改定不必限額本年禮部奏請仍照
每學入學額數限定錄送之多寡以杜冒濫得

旨允行至是復奉

上諭各處赴試童生多寡不等若限以錄送數目恐有

浮多於額外而擯棄不取者即有不足於額中而強取充數者未必俱當况府州縣錄送去取全在學政並無關於入泮之數應稍寬其途以鼓舞之亦廣育人材之道嗣後仍照舊例不必限定考送之額但將文理不通者擯棄不錄至二十三年又

飭直省府州縣考試毋得濫行錄送俱著酌量按照地方人數核實取錄以昭慎重

定甘肅安西等五衛廩增額數廩增各三名

定直隸遵化州學取進童生額數遵化州升為直隸州取進文童生十八名武童生十五名

定山東商籍廩增額數廩增各五名

定雲南昭通等府州縣學廩增額數雲南昭通二府學鎮雄州學永善縣學並設廩增各八名

十年令直省考驗教職及應選教職人員勿以限年勤休先是九年大學士九卿遵

旨議准以甲子年為始每遇鄉試之後令各省督撫學

政將應選教職人員除學業堪以司教者仍注冊
備選外其精神衰憊無用者槩給以應得職銜勒
令休致至該員輪選之時仍令督撫照例驗看考
試其不堪選用者亦給以應得職銜勒令休致若
年至七十精力既衰學業荒廢斷難勝任古人原
有七十致仕之義所有現任教職令學政確查年
歲清冊七十以上即知會督撫咨部令其休致嗣
巡撫晏斯盛以歲貢年已七十應否扣選請

旨奉

硃批古來申公伏生老而傳經人之可用與否未可以
年齒論譬如年逾七旬而強健者亦不可銓選乎未
至七十而病憊龍鍾者亦可姑容乎惟當視其人之
可用與否以為去取不當以七十為限總在督撫學
政秉公實心辦理庶有裨益至是
上以此旨未曾頒布各省恐皆未會

聖意又上年鄉試後驗看教職老邁者業去大半

特諭嗣後此例不必每科舉行候朕因時制宜酌量降
旨其恩拔歲副及挨貢應用教職者驗看之處仍照舊
例行至該員臨選時給發文憑到日仍加考驗必精
力文藝足勝司教之職方准領憑赴任

又奉

上諭國家設制科取士首重者在四書文蓋以六經精
微盡於四子書設非讀書窮理篤志潛心而欲握管
揮毫發先聖之義蘊不大相逕庭耶我

皇考有清真雅正之訓朕題貢院詩曰言孔孟言大是難
乃古今之通論非一人之臆說也近今士子以科名
難於猝獲或故為艱深語或務為俳儷語爭長角勝
風簷瓊院中偶有得售彼此倣倣為奪幟爭標良技
不知文風日下文品日卑有關國家掄才大典非細
故也夫古人論文以渾金璞玉不雕不琢為比未有
穿鑿支離可以傳世行遠者至於詩賦揆藻敷華雖
不免組織渲染然亦必有真氣貫乎其中乃為佳作

今於四書文採掇詞華以示淹博不啻於孔孟立言
本意相去萬里矣先正具在罔識遵從習俗難化職
此之故自今其令各省督撫諸臣時時訓飭鄉會考
官加意區擇凡有乖於先輩大家理法者擯棄不錄
則詭遇之習可息士風還淳朕有厚望焉該部通行
曉諭中外知之

定散給學租之法舊例學臣散給學租於各處考
試事竣始據各學冊報給發其中易滋弊端至是

奉

上諭散賑於考試事竣之日何如散給於士子雲集之時嗣後學政學官確查極貧次貧造具細冊於按臨之日投遞學臣核實即於三日內逐名面賑則貧生均沾實惠該教官等如有濫開混報等弊亦易查出
叅處

申嚴童生頂名冒考之弊向來江蘇陋習童生應試率皆彼此通融互考甚且有一人冒考數處或

多做重卷數名以為院試時售賣之地者事

聞奉

上諭各府州縣皆有烟戶冊籍誠於州縣考試之時童
生報名查對烟戶無訛方許廩保填結府考院考俱
令原保廩生識認則冒籍頂名之弊可除著督撫轉
飭所屬實力奉行學政亦不時稽查如有仍蹈前轍
者按律究治至十二年併議准寄籍之恩拔歲貢及
由俊秀寄籍之捐納監生並勒限三月自首改歸

本籍其現任教職內有係本邑及鄰邑之人亦令
呈明改歸本籍違者叅革

又

命順天府大宛兩縣寄籍者改歸本籍並申定儒童考
試認保審音之例凡現任京官及候選中式之進
士舉人貢監生與廩膳增附生員等除入籍二十
年並無原籍可歸者不議外統以一年為限具呈
順天府咨歸本籍仍報明吏禮兩部注册其生員

食餼挨貢悉照本生年分次序倘逾限不改京官
照規避例革職進士舉人貢監生員即行黜革如
該管官奉行不力住俸一年其直省大小官員由
冒大宛兩縣籍貫出身者亦呈明各該上司改歸
原籍仍咨吏部存案逾限者照例議處至每逢考
試大宛兩縣童生令知縣教官將素行優謹之廩
生申送府丞查核方准臨期認保於府試審音前
該府丞移咨都察院滿漢御史各一員會同審音

如有不合究出情弊即將本生廩保照變亂版籍律杖革如受財冒保計贓從重教官婪贓者革職交刑部計贓定罪

申嚴直省生員欠考積弊凡係病假生員其上屆開報者下屆果係遊學未歸患病未痊該教官查驗確實再行詳請展限一次俟病痊回籍即送補考如欠至三次以外俱不准展限竟行黜革倘有扶同捏報不行詳請展限者該學政嚴查將教官

叅處以專責成

十一年定彙報開復除名案由冊例

十二年定四川岳池縣學廩增各十名額數

十三年

上謁

孔林廣山東通省入學額數奉

上諭國家崇儒重道尊禮先師朕躬詣闕里釋奠廟堂
式觀車服禮器用慰仰止之思念魯國諸生素傳禮

教應加恩黌序廣勵人才山東通省入學額數著格外加恩增廣一次府學大學增取三名中學二名小學一名以廣聖澤以光文治

定湖南永順府縣等學廩增各額數永順府學廩增各十名永順龍山保靖桑植四縣學俱設廩增各六名

定雲南鎮沅等府縣學廩增各額數鎮沅府學廩增各十名普洱府學思樂縣學黑白琅三鹽井學

均設廩增各八名

十四年頒

御製平定金川告成太學碑文於直省學宮

詳見太學門

十五年增定廣東鶴山縣廩增額數原設各十名

至是各增五名

十六年

上南巡江浙

命增本年江蘇安徽浙江等處府州縣學儒童入學額

數大學增取五名中學增取四名小學增取三名
舉行一次至二十二年二十七年三十年

南巡盛典並如初例

又奉

上諭經史學之根抵也會城書院聚黌庠之秀而砥礪
之尤宜示之正學朕時巡所至有若江南之鍾山書
院蘇州之紫陽書院杭州之敷文書院各賜武英殿
新刊十三經二十二史一部資髦士稽古之學

又定裁肇高學政歸併廣韶學政考試

又

命各省甄別教職所遺員缺即以應授教職之選拔貢生充補

減定山東膠州學取進靈山衛童生額數原定衛籍童生八名至是減去三名

增定四川綿州等學取進童生額數綿州取進十名德陽羅江各六名新津雙流新繁彭縣崇寧各

八名

十七年減定廣西永寧州學廩增各額數原額各三十名至是裁減各十名

增定四川眉州等學廩增各額數舊定眉州學各十四名青神彭山二縣學各八名至是均改設各三名眉州取進童生十名青彭二縣學取進童生各六名

定考試生員儒童卷面用經解印記之例各學政

按臨之初即將該提調冊報能對經解之生童分別考試其答不失指者即於正試卷面加以經解印記以便閱卷時照例辦理

十八年申定直省甄別教官例定例各省教職六年俸滿該督撫學政公同甄別堪膺薦舉者保題送部引

見其年力衰邁者咨部休致至是奉

上諭嗣後教職除有劣蹟者隨時叅劾外至六年俸滿

堪膺民社者保題其年尚強壯精力未衰可以留任者出具考語送部引見若准留任俟六年再滿仍如是甄別如年老人員即著咨部休致有願來京引見者照大計之例該督撫聲明給咨引見至訓導甄別之例與教職同著為令至二十二年又定雲貴川廣福建湖南甘肅等省教職改為八年一次甄別保題至來京亦不必專檄獨行聽其從便結侶請咨送部引

見餘近省分仍照舊例行

十九年定安徽臨淮鄉學例先是江蘇海門縣裁
歸通州以海門縣學改為鄉學童生另額取進至
是安徽裁汰臨淮縣歸并鳳陽縣援照海門鄉學
例將臨淮縣生童另編為臨淮鄉學字樣取進額
數及廩增出貢之處悉照舊例辦理

二十年奉

上諭揚廷璋奏武生監生俱令教官督課約束一摺言

雖是而行之則無實濟不肖生監或倚恃青衿武斷
滋事原屬法所必懲向來何嘗不著為定例令該教
官一體管束然以生監之衆安能責之一二司鐸微
員即文生係其專管尚有防檢不周者是即屢定科
條仍屬有名無實何益之有惟在該督撫等平時督
率屬員留心化導一遇有作姦犯科之事即隨時黜
究以示懲儆況生監等既為凡民之秀果其讀書自
愛自當優以禮貌若乃干犯教令甘蹈罪網則其情

視虫者為更重又豈得專委司教而不力為振刷
耶近有縣令狗彘劣衿加以處分者正以地方官有
整齊士習之責也嗣後各督撫其嚴飭所屬地方無
論文武生監俱令悉心體察倘有不遵約束恃符生
事者即行按法究治毋徇私邀譽視為具文

頒

御製平定準噶爾告成太學碑文於直省學宮

詳見太學門

二十一年減定江南金山衛學取進童生額數原

額二十名至是減四名

定湖南衡陽分設新縣儒學各額數衡陽原額取進童生二十名今分設新縣將衡陽縣學定為取進十名原額廩增亦各分其半出貢之年兩學輪貢一人衡陽縣學訓導改為新縣訓導

二十二年清釐順天冒籍生員禮部議准順天學政莊存與條奏查出冒籍各生暫請停其南北歲科兩試照定例一年令本生自首至咨查原籍取

結往返難以一年為限除已為查確取結者聽歲
科鄉試外餘並停其鄉試以杜冒濫奉

上諭此等冒籍生員即永停鄉試亦不為過若未經查
明遽准與試必致仍多弊混著將冒籍各生停鄉試
一科以便清釐永杜冒濫

定廣東西寧信宜兩縣學取進生童額數時西寧
懷鄉司屬之定康信豐感化從善等四都既經改
隸信宜縣管轄減去西寧學額二名升入信宜因

定歲科二試各以十名為額

又申定蔚州訓導管理鄉學例直隸總督方觀承
題宣屬文風兩蔚為盛今蔚縣裁歸蔚州管轄而
讀書士子不減于前請將原住蔚縣生童另編鄉
學字號歲科兩試取進額數及考補廩增出貢之
處照舊辦理所有蔚州學正仍管本學事其訓導
一員專司鄉學另頒學記以專責成部議應如所
請從之

二十三年又定江南阜寧山陽鹽城等縣學取進
童生各額數江蘇學政李因培條奏將居住山鹽
二縣現充阜寧縣學諸生及應試子弟清查改歸
本籍外應將阜寧縣學取進文童定為八名武童
六名其阜寧原額應改撥山陽鹽城文童各二名
武童各一名廩增亦應撥還山陽二名作實廩實
增鹽城毋庸改撥所有阜邑改歸本籍廩增作虛廩
虛增照考案揆補部議應如所請從之

定考試貢生改判為詩之例先是二十一年奉

旨將鄉會二場試題改去表判易用五言八韻詩至是御史陳大復條奏各省選拔貢生二場亦應改判為詩部議應如所請并議各省歲貢亦應改判為詩從之

改定歲科兩試文藝之例向例生員歲試作四書文二篇經文一篇冬日一書一經科試作四書文一篇經文一篇時務策一篇至是御史劉龍光奏

請歲試用一書一經科試用一書一策不論春夏
秋冬考試俱增試律詩一首五言六韻學臣命題
遵照鄉試題定之例期於中正雅馴不許引用僻
書私集其應用韻本令學政官備辦臨期給發以
便士子檢閱部議應如所請從之

改定大名元城等學取進童生額數及魏縣為鄉
學各例直隸魏縣裁缺就近改併大名元城二縣
管轄魏縣原額十八名武童十五名內撥文武童

生各二名大名縣原額文童十八名武童十五名
內撥文武童生各一名俱歸入元城縣將元城縣
學額定文童二十一一名武童十八名大名縣學額
定文童十七名武童十四名其撥剩之魏縣原額
文童十六名武童十三名另編鄉學字樣考試取
進大名縣訓導一員專管鄉學事務

增定江西寧都直隸州學取進童生額數定例瑞
金石城增額三名內各減一名撥給寧都州學以

寧都升縣為州不得仍分贛郡學額也

二十四年設簿稽查生監詞訟按季立簿由學政
印發各州縣於自理詞訟及上司批查事件內有
生監屬原告或係被告者將兩造姓名簡明事由
已結未結按月登記兩季申繳一次聽學政查核
如生監為人作証係他人牽連許本生辨明免其
開注若係無故多事出身作証即屬不守學規令
地方官詳明學臣分別戒飭

停止捐納貢監歸各學教官管束之例向例捐納
貢監照依生員之例一併歸學舉報優劣嚴加約
束至是以捐納貢監其途本雜教官職司訓課不
能董率稽查仍責成州縣官約束除犯細事應行
戒飭者仍會同教官面行扑責外其餘事件教官
例不得干預府州縣仍遵例將犯案緣由申報督
撫學政查核至舉報貢監優劣學政臨按時仍行
照例揭報

又奉

上諭前因磨勘順天等省鄉試卷見其中詞句紕繆者
不一而足甚至不成文義如飲君心於江海之語於
文風士習深有關係已降旨宣諭中外俾衡文作文
者知所警惕第念別裁偽體以端風尚固在考官臨
時甄拔公明而平時之造就漸摩使士子皆知崇實
黜浮不墮揣摩撻撻惡習則學政責任尤重鄉會兩
試乃士子進身階梯而學臣於三年之前歲科考校

評薦甲乙者此日之生童即可為他日之舉人進士
所云正本清源舍是無由也為學政者果能以清真
雅正為宗一切好尚奇詭之徒無從倖售文章自歸
醇正否則素日趨向紛歧一當大比為試官者鑠闡
校拔不過就文論文又何從激勸而懲創之且學政
按臨謁廟講書原與士子相見非考官易書糊名暗
中摸索者可比文字一道人品心術即於此見端自
應隨時訓勵整頓務去佻巧僻澁之澆風將能為清

真雅正之文亦可望為醇茂端謹之士由此賢書釋
褐足備國家任使斯士子無負科名而學臣亦不負
衡文之任但不得因有是旨徒以字句疵戾易為磨
勘指摘遂專取貌似先正之文於傳註無所發明至
相率而歸於空踈淺陋此又所謂矯枉過正救弊適
以滋弊不獨輿論難誣一經朕鑒察亦惟於該學政
是問今歲正學政受代之始諸臣皆朕特簡各宜勉
副興賢育才至意著將此旨錄於學政公署并各府

州縣學明倫堂用資觸目警心而凡我多士亦皆得
審所就範朕實有厚望焉

二十五年禮部議覆江蘇學政李因培條奏清查
屯衛事宜一查明該衛勲軍屯軍戶口及坐落各
縣責成該衛守備彙造戶口清冊分送學政司府
三處存貯將來童生應試持此核對如有不符即
行剔除一從前民籍冒進生員即令改歸民籍其
子弟俱隨父兄之籍考試不得轉輾混冒一衛籍

考試宜歸衛守備報名錄送提調轉送學政衙門
該衛弊端即令松江府查察以專責成一童生既歸錄
送應令守備在該衛適中之地考試以免童生跋涉
之艱均應如所請行至金山衛學廩增二十名既經
將冒籍各生改歸應將原額二十名內撥出華亭婁
縣上海南匯四學各一名外再酌減四名出貢并分
酌議三年一貢其取進童生先經二十一年裁定十六
名今應再酌減四名以十二名為定額從之

申嚴邊省生童寄籍冒考之弊先是粵西本地應
試無人准其令外省及本省異府人入籍嗣經冒
籍紛紛議准停止至是學政鞠愷奏粵西應試生
童多係冒籍現在嚴行查辦并請將已經冒籍入
學各生准照順天冒籍生員罰停鄉試一科例辦
理事下部議並

諭此等冒考弊竇在江浙等處尚少他如雲貴川廣偏
僻州縣文風稍陋他省人或因父兄作幕或因親交

貿易遂爾乘便混考皆所不免并著各該學政留心
查察毋使滋弊尋議冒籍各生照例停科以示警戒
並行知雲貴川廣學政遵照辦理從之

新設湖南永綏廳學先是二十四年湖南學政鄭
虎文奏辰州府屬之乾州鳳凰永綏三廳皆新闢
苗疆乾鳳二廳已於雍正十年設學取士人文日
開比隆內地惟永綏建治稍後未經設學請照乾
鳳二廳之例一體設學經部議督撫會同學政查

明實在情形詳悉妥議至是查覆該地民苗童生肄業義學頗通文義堪以應試者二百餘人應一體設學其教職一員以辰谿縣訓導管理部議應如所請從之

改定考試童生文藝之例向例四書文二篇經文一篇至是裁去四書文一篇增試排律以一書一經一詩命題

定直省學臣考試無得割裂命題并停止試卷解

部磨勘之例

二十六年定義學歸學臣考核之例雲南學政李中簡奏請嗣後各府州縣義學教習如係舉人副榜拔貢歲貢文理本優者聽各屬延請冊報外其生員飭令該教官將文理優通品行純篤者保送地方官該印官覆加訪核親試然後延請仍令教官不時稽查如有荒廢學課生徒游蕩者即行更換其別途初學之輩不許延請得

旨允行

頒

御製平定回部碑文於直省學宮

詳見太學門

改併甘肅華亭所屬生員入固原州學以是時甘肅華亭縣屬之瓦亭驛何家大堡改隸固原州因將瓦亭驛何家大堡等處文武生員俱改歸固原州學

二十七年增減四川茂州等州縣童生入學額數

原定茂州取進童生十二名保縣十二名松潘八
名越雋八名資州八名眉州八名新寧四名至是
學臣以茂州松潘越雋保縣應考之人稀少請將
茂州保縣各減四名松潘越雋各減二名酌加資
州四名眉州二名新寧二名尚有二名俟松潘等
處人文稍盛奏請增給部議應如所請從之

更定四川茂州等州縣廩增額數茂州原額廩增
三十名減去十名松潘越雋二十名各減去二名

保縣二十名減去六名量加資州五名眉州五名
新寧五名餘五名加於新寧所分之梁山縣學
增設貴州荔波縣廩增額禮部議准學臣湯先甲
條奏荔波縣由廣西改入黔省尚未開設廩增以
致現在童生並無保結應額設廩增二名自乾隆
二十八年為始

定考列下等武生罰贖對讀之例禮部議准江蘇
學政李因培條奏武生考列四等全無文理以之

對讀文生之卷伊等亦自揣不能每多規避請照
文生不願對讀者一體准其罰贖銀三兩解交藩
庫催覓對讀至二十九年更定五等武生亦照五
等文生罰贖之例罰銀六兩仍令解交藩司照例
辦理

二十八年定江西棚民入學悉歸土籍之例先是
雍正九年定棚民另額取進之例至是議准均歸
土籍考試毋庸另立棚籍以杜冒佔

二十九年定四川嘉定等府縣學廩增生員各額
先是議准川陝總督尹繼善題請新設嘉定潼川
二府學各取進文童十五名樂山三臺二縣原係
州學今改縣學應將原額廩增各三十名內撥十
名入府學至是學政博卿額奏請嘉定潼川二府
各添廩增十名部議應如所請從之

更定生員補考之例嗣後隨棚補考生員即令本
地府廳同教官嚴加考試將原卷鈐印封送學政

毋令本生親賁另差門斗伴送補考其隨棚提調
考試補送并逕由教官補送之處概行禁止

又

頒發周易述義詩義折中春秋直解於直省學宮

裁併山西清源縣改為鄉學例裁清源歸併徐溝
縣管理其清源縣學改為清源鄉學考試生童另
編鄉學字樣考試事宜照舊辦理其考試武生亦
照文生童一例辦理徐溝縣訓導移駐清源鄉學

頒給徐溝縣訓導管理清源鄉學鈴記

定督撫委署教官咨明學臣例嗣後教官缺出毋論暫署委署督撫均於委署時咨明學臣存案該員仍將到任日期報明學臣備案

定生員承襲土司規避考試之禁嗣後土司由生員承襲者自揣不能應試准其告退其願應試者飭令如期應試不得托故避考違者黜革

銷燬刪本禮記湖南學政李綬奏嗣後專習禮記

生童須讀全經不得仍以刪本自欺其現在坊間
所刻刪本禮記飭令地方官出示銷燬已經刷印
者禁止販賣毋許存留部議准行從之

裁定山西平順鄉學例裁平順縣歸并潞城黎城
壺關三縣管理其原隸平順生童准另編平順鄉
學字樣裁汰平順學訓導仍留鄉學即隸潞城縣
管轄仍給潞城縣管理平順鄉學鈴記

三十年

上南巡

詔增本年江蘇安徽二省分縣選拔貢額定例選拔貢
生府學二名州縣學一名江蘇安徽二省有分設
各縣仍于新舊兩學中彙拔一人貢入成均肄業
至是

上念分設各邑版籍既繁膠庠亦盛兩學合取一人懷
才者未免拘於常格

特加恩將分設各縣於本年選拔時每學各取一人

又

頒發

御製詩初集二集

御製文初集各一部於直省

減定四川夔州府學廩增額數先是雍正十二年
額減取進生童名數廩增額缺未經議裁至是學
政以該學人文與四十名廩增額缺不能相稱請
定為三十四名其餘六名裁汰部議應如所請從

之

陝甘總督楊應琚奏甘省蘭山書院延請丁憂在籍之府丞史茂來主講席

上以回籍守制之員竟居省會書院教授生徒與地方官應酬則與居官無異微特人子之心難安亦無以為多士表率

諭曰督撫有維持風教之責縉紳積學砥行之儒足備師資者諒不乏人何必令丁憂人員覲居講席是應

聘者固不能以禮自處而延請之地方大吏亦復不能以禮處人於風化士習微有關係恐他省不無類此者特為明切曉示通諭之

皇朝文獻通考卷七十一

欽定四庫全書

皇朝文獻通考卷七十二

學校考十

直省鄉黨之學四

乾隆三十一年增定福建分設屏南縣學本籍寄籍取補廩增例雍正十三年分古田為屏南定入學額數每縣各八名廩增各缺亦均分兩學嗣因屏南文風不及古田禮部議准古田童生寄考屏

南額取四名名曰寄屏其本籍童生額取四名名曰正屏廩增額缺輪流間補至是學政王杰奏屏南廩增十缺多為寄屏所佔正屏無廩童生考試亦無認保請將歲科試卷面註明正屏寄屏字樣以便酌量錄取從之

嚴申送歲貢入監肄業例各省歲貢赴監例由地方官取結覈其籍貫有無違礙方行申送至是并令詳驗本生年力不得以精神衰邁之生濫行申

送赴監

三十三年禮部議准四川雅州府人文日盛應與
邛州分棚考試另立一棚邛州照舊自為一棚學
政以次按臨考試

又議准廣西土民佃種土官之田向聽土司役使
充兵若准其應試一經上進勢必不服差徭其果
有志向上退還所佃之田實無原籍可歸者方准
令土司送考如退佃准考之後仍隱占土官田地

託避徭役該地方官嚴查究處

又議准查各省造送學冊其府學生員並不註明
係某州縣籍貫以致遇有報捐等事無憑核對嗣
後各該學政造送學冊務將府學生員名下查明
本州縣籍貫詳細填註毋致舛錯以備查核

又咨覆浙江巡撫永德咨稱廩生丁本生父母期
年憂例不出缺其廩糧各學有照舊支給者亦有
停糧扣除者辦理兩歧當經行查戶部據稱江南

等十三省奏銷冊開丁憂廩生廩糧銀兩係扣缺
造報並未造有期喪扣缺之款浙省事同一例應
畫一辦理

三十四年設立迪化寧邊二廳學額議准烏魯木
齊地方駐兵屯田招徠開墾生齒繁盛自設立義
學以來兵民子弟俱各踴躍現在讀書習弓馬者
均有成效照安西敦煌等縣之例設立學額以示
鼓舞應將迪化寧邊二廳兵民子弟內歲科兩試

每廳各取進文童四名歲試取進武童四名交與兩廳管束其考試事宜均照安西之例歸於陝甘學政咨部辦理但烏魯木齊距甘肅遠諸童應試維艱應令陝甘學政按臨肅州之前將考試文武生童題目封固預行密送駐劄大臣俟廳道將錄取應試文童名冊呈送到日嚴行局試仍將試卷封固移送學臣按額取進其武童外場弓馬技藝由廳道錄送駐劄大臣考試分別等次造冊并

考試策論一併移送學臣按額取進如文武童生
試卷不能足額均照例寧缺無濫

又議准吳縣太湖內東西兩山分隸太湖同知所
轄舉貢生監遇有丁憂服滿事故等項准其就近
取結送部監生北闈鄉試亦合歸廳給文其鄉會
科場起送并舉報節孝等案應令吳縣儒學查明
送廳轉詳

又議准雲南永北府既改為掌印同知並無府佐

州縣等官其考試童生應照蒙化景東二府之例
即令掌印同知考試申送學政錄取

又議准泰州額設廩增既將十名分撥東臺縣若
仍照州學例三年兩貢未免太驟應改為二年一貢
三十五年

諭畿輔為首善之區人文漸被多士蔚興上屆臨幸天
津曾加恩廣額用光黌序乃者

慈禧普被懽洽敷天業已特開鄉會恩科彙徵叶吉而

鑾輅經臨推恩行慶並宜嘉惠士林所有直隸通省本年
入學名數大學增額五名中學增額四名小學增額
三名該學政其悉心甄錄務拔其尤以副樂育作人
至意

是年禮部議准四川羅江縣裁併綿州又羅江縣
學原額六名內分撥綿州四名嗣後綿州連原額
十名共取進十四名其二名撥入梓潼縣學連原
額八名共取進十名羅江縣廩增額數歸併綿州

廩增各三十名與州學定額相符應照州學例三年兩貢毋庸與彰明德陽二縣輪貢其彰明德陽二縣廩生各額數均止有十名應照清溪縣之例四年一貢梓潼縣廩增額數及出貢年分仍循舊例

又議准大宛兩縣童生令知縣教官遵例慎選素行優謹衆所共信之廩生申送府丞該府丞臨時復實心查核如有濫選妄保諸弊聽其隨時查辦

又議准江南省和州江浦二縣縣交界之豐樂宋家唐家馬家華家黃墩等六圩統歸江浦縣管理其考試報捐等事亦應改隸江浦縣所有現隸和州之捐納各生應改換江浦籍貫得

旨允行

又議娼優隸卒子孫雖經出繼不准收考凡娼優隸卒專以本身嫡派為斷本身既經充當賤役所生子孫例應永遠不准收考其子孫雖經出繼為

人後者終係下賤嫡裔未便混行收考

又議准定例舉貢生監罪在杖一百以內革後能改過自新者該地方官查明取具里鄰確實甘結申送准以原名應試若於結案時即聲明辦理其能改過自新與否尚未可知嗣後如係舉人斥革願以原名應試者由該督撫核明咨部定議其貢監生員斥革後呈請原名應試應照例令鄰里出具甘結由教官牒送該州縣官申送提調官詳報

學政収考

三十六年

聖駕東巡增廣山東學額一次大學加取五名中學加取四名小學加取三名嗣覆准山東省遵奉

恩詔增廣學額查靈山衛業已歸併膠州並非各為一學且於乾隆十六年減去進額三名若膠州既照大學例增額五名靈山衛復照小學例增額三名未免浮濫應於膠州增額五名內酌與靈山衛一

名

又禮部議准雲南之永北蒙化景東三府各改為
直隸廳仍照原額各取進士生二十名武生二十
名原設廩增及出貢年分俱毋庸裁改元江府原
額文武生各二十名係與他即通判合取今改府
為直隸州他即改歸普洱府應將元江直隸州學
額改為文武生各十五名廣西府原額文武生各
二十名係與五槽通判合取今改府為直隸州五

嘈改歸曲靖府應將廣西直隸州學額改為文武
生各十八名所減二名作為五嘈之額撥歸曲靖
府元江廣西各原設廩增各四十名今改為三十
名三年二貢鎮沅府原額文生十名內有威遠同
知撥入二名武生八名今改府為直隸州威遠改
歸普洱府應將鎮遠直隸州學額改為文生八名
具武生八名及廩增額數出貢年分俱毋庸議改
普洱府原額文武生各八名今威遠撥歸文生二

名他郎撥歸文武生各五名應增為文生十五名
武生十三名原設廩增各八名今增為十二名二
年一貢武定府原額文武生各二十名係和曲祿
勸二州及元謀縣分撥今改府為直隸州裁汰同
城之和曲州應將和曲州本額文生十二名并撥
府十名武生八名并撥府十名歸入武定直隸州
仍照大學之例定為文武生各二十名武定原設
廩增各四十名今改為各三十名三年二貢至祿

勸州改為縣本額文武生各八名并撥府文武生
各六名應定為祿勸縣學額進文生十四名武生
十四名原設廩增各三十名今改為各二十名二
年一貢元謀縣本額文武生各八名并撥府文武
生各四名應為文生十二名武生十二名原設廩
增及出貢年分俱毋庸議改姚安府原額文武生
各二十名係撥姚州大姚縣文生各八名白井文
生四名撥姚州武生十一名大姚武生九名今該

府既裁應將府學原額酌歸姚州大姚縣文生各
八名武生各八名白井文生四名武生四名姚安
府原設廩增應行裁汰姚州大姚白井各原設廩
增及出貢年分俱毋庸議改鶴慶府原額文武生
各二十名今改府為府屬州仍取進文生二十名
其武生二十名應改為十五名原設廩增各四十
名今改為各三十名三年二貢彌勒師宗建水三
州今改為縣彌勒縣照原額取進文武童生各十

五名師宗縣照原額取進文武童生各十二名建
水縣照原額取進文生二十名武生十五名彌勒
師宗建水各原設廩增各三十名今改為各二十
名二年一貢順寧府原設文武生各二十名今新
設首縣應將府學裁去文武生各八名作為順寧
縣學府學原設廩增各四十名今改為各三十名
三年二貢麗江府原額文武生各十五名今新設
首縣應將府學裁去文武生各七名作為麗江縣

學府學原設廩增各三十名今改為各二十名二
年一貢順寧麗江二縣均設廩增各十名四年一
貢各府州所裁廩增應歸於現在所隸本籍作為
候廩候增歲科兩試各按考案新舊間補

又議准生員代人作證經地方官審係全誣則故
撻法網較之尋常已攬者其情尤重應行詳請褫
革卽照教唆詞訟本罪上各加一等治罪如計賊
重於本罪者仍照律以枉法從重論其訊明事屬

有因並非捏詞妄證者雖證佐確鑒而以全無關涉之事出入公庭其平日不能讀書自愛已有明驗亦應將本生嚴加戒飭倘再犯案申詳黜革

又議准陝西學政劉墀奏稱山陝之樂戶江浙之丐戶雖編籍由來無不確據而其相仍託業實屬卑污雍正元年因御史年熙噶爾泰先後條奏准令除籍改業得為良民正所以杜其邪僻之路非即許其廁身衣冠之林嗣後應酌定限制如削籍

之樂戶丐戶應以報官改業之人為始下逮四世
本族親支皆係清白自守方准報捐應試設管州
縣取具親黨里隣甘結聽其自便若僅一二世及
親伯叔姑姊尚習猥業者一槩不許僥倖出身其
廣東之蛋戶浙江之九姓漁戶及各省凡有似此
者悉令該地方官照此辦理所有從前冒濫報捐
各生均行斥革

又議准奉天復州學額自雍正十二年為始照小

學例取進八名蓋平廣寧二縣學各取進二名今復州應試僅三十餘人蓋平廣寧二縣應試自三十餘人至五十餘人不等各學額數未昭平允應將復州原額八名照遼陽寧遠二州之例改為五名即以復州所減三名撥增蓋平廣寧各一名仍餘一名歸入奉天府學令該府丞於府屬州縣內撥取武童亦照此例辦理再復州原設額廩增各五名較之遼陽寧遠二州尚少二名應仍其舊

又議准湖南衡永寶辰郴靖等府州所屬徭童向
例另編字號於正額外各量取一二名嗣於雍正
三年因額少人多定議增為三名今永州府屬之
東安永明二縣每試徭童不過數人而寧遠縣則
有百餘名多寡懸殊應將東安永明徭童進額各
減二名定為一名至寧遠縣應試徭童既多應於
東安永明二縣所減四名內酌撥二名作為定額
五名

三十七年貴州巡撫李湖奏黔省書院掌教張甄
陶由編修改授雲南昆明縣嗣在雲南五華書院
掌教五年經前督臣劉藻奏明移為貴山書院掌
教已滿六年克著成效應照五華書院掌教孫見
龍例議叙給與八品官職銜從之

又議准河南內黃縣應試童生僅三百餘人湯陰
縣應試童生六百餘人文風較勝應將內黃進額
裁減三名增入湯陰縣兩學額數均各取進十五

名

又議奏

盛京學宮每歲春秋祭祀沿用民間鼓樂於

文廟定制有違請令該府尹等將需用樂舞等器按

照

欽定皇朝禮器圖如式製造其額設樂舞生照

闕里之例酌選稍通音律者送太常寺肄業俟熟諳

時咨回本學令其轉相傳授從之

又議准定例娼優隸卒之家不准考試其皂隸馬快小馬禁卒之子孫有朦混捐納者俱照例斥革至門子長隨湖南省有濫行報捐者均予斥革惟民壯一項雍正年間先後議准各省民壯原為捍禦城署倉庫而設應停其承緝盜犯端令學習武藝其中有技藝可觀者准挑入營伍漸次考拔是民壯既與兵丁一律拔補自非賤役可比應不便阻其進身之階但各省俱有皂快民壯三班隨時

改撥者應令地方官查明除未經改撥之民壯子
孫准其報捐應試外其由民壯改充皂快及其先
曾充當皂快者仍不准報捐應試以杜冒濫

又議准奉天府屬滿合生員散居各州縣者於雍
正五年議令撥歸各該學與民籍諸生一例收管
所有現在滿合諸生居址應即交與該將軍查造
清冊咨送府丞其補廩補增出貢等項由府丞查
明撥行各該學申送仍令奉天府學照例註冊於

各名下註明某州縣字樣送部查核

三十八年禮部議准湖南省庫子斗級據該撫查明係選擇質樸殷實農民承充與皂隸馬快禁卒門子等役不同其子孫應照民壯之例一體報捐應試如有先後改充皂快禁卒門子等役者應仍照例不准報捐應試得

旨允行

又議准廩生報劣照考列四等之例停支廩糧仍

照例察看怙過不悛者即行斥革如果改悔自新確有實據仍於冊內門註改過字樣俟報部核准後再行開支

又議准江蘇金山衛學裁汰將取進童生原額十二名分撥華亭婁南匯三縣各三名廩增生缺亦各三名奉賢上海金山三縣各一名廩增生缺亦各一名作為定額歲科兩考照蘇太等衛之例於冊卷填明衛籍字樣其已進之廩增附生俱撥歸

住居之縣學教官就近管束廩增均先儘實缺補足餘俱作為候廩候增照例新舊間補

又議准生童無籍可歸者許於寄籍應試報捐各事宜童生應試有籍可歸者飭令撥回原籍以杜兩處歧考之弊至入籍已久而原籍地方並無田產室廬則雖有原籍之名實無可歸之業嗣後除寄籍未久原籍尚有嫡親伯叔兄弟及本人名下確有田產室廬可倚者仍照例撥回原籍若原籍

僅存疎遠族屬本人名下並無田產室廬其入籍
年分已與定例相符者該地方官查明確實申詳
督撫學臣立案准入於寄籍地方應試報捐又順
天寄籍人員既令呈明更正其子弟除入籍已逾
二十外其有實非土著從前寄籍順天之舉貢
生監俱勒令一體改正統限一年內著落本生自
首咨回原籍嗣後大宛兩縣捐納貢監生以及捐
職人員先令取具同鄉京官實係土著印結粘呈

戶部查核仍於收捐後將所具印給劄順天府飭
交大宛兩縣備案存查

又議准除兵丁鄉試名目兵丁取進武生一體由
學臣考試分別錄送入闈不必另立兵丁鄉試名
目以致科條歧異

是年設巴里坤學額巴里坤為關外藩屏自新疆
式廓以來拓地二萬餘里巴里坤為四面適中之
區邇年城郭民屯繁庶久同內地遵

旨將巴里坤改設為府即以烏魯木齊為屬州所有哈密闢展穆壘及附近設有職官之處並歸管轄向隨安西所屬三縣赴肅州考試往返四千餘里難以跋涉應照烏魯木齊迪化寧邊二廳封題考試之例專設學額歲科兩試取進文童各四名歲試武童取進四名今陝甘學政按臨肅州之前將文武童生試題封固密行安西道將該府縣錄送童生嚴密局試封送學政按額取進其武童外場弓

馬技藝由府縣錄送該道會同駐劄大臣考試分別等次造冊并考試策論將試卷一併移送學臣按額取進寧缺毋濫嗣於三十九年四月議准巴里坤改為鎮西府附府設宜禾縣嗣後考試童生先由該府縣錄取造冊呈送陝甘學政俟學政按臨肅州之前將題目封發鎮西府嚴密扁試並將試卷密送學政按額錄取其武童外場弓馬技藝由該府會同巴里坤鎮考試分別等次造冊並將

考試策論同試卷一併封送學政閱取至鎮西府
學應於所屬宜禾縣生童內歲科兩試各撥府學
文童二名歲試撥武童二名

增減四川資州等學額四川資州所屬之資陽仁
壽二縣學現在應試人多原額各進八名井研縣
學文童較少原額進十二名應將井研額內酌減
二名以一名撥入資陽一名撥入仁壽均作為定
額再成都所屬之金堂縣原額進八名綿州所屬

之德陽縣原額進六名今人文日起童試人數漸多未免限於名額應將乾隆三十七年議裁松潘等處學額所餘二名分撥金堂德陽二學各給一名

又議准陝西學政楊嗣曾奏甘肅寧夏府鄉試於順治二年題准設立丁字號每科額中二名今該府人文頗勝他屬請照涼州聿字號乾隆十四年議准事例以一科歸入大號與通省公同比試一

科仍列丁字號取中二名嗣後寧夏鄉試准其一
科與通省合試憑文錄取毋庸另編字號一科仍
列丁字號照舊額取中俟將來文風益盛再行統
歸大號鼓勵邊陲士子較有裨益從之

諭昨據禮部議馭四川學政吳省欽奏請科考文生錄
取二三等者先將坐號一體榜示已照部議飭行比
詢及考試生員出案事宜據大學士于敏中面奏從
前曾任浙江山東學政俱按照舊時章程辦理初按

臨時先考生員大學不過十日小學不過七八日為期從不過遲學臣不能早為閱卷發案者皆緣見小惜費不肯多延幕友所致應請通飭各該學政實力妥辦等語國家所給學政養廉本屬豐厚原以資其辦公之用若於延致幕友尚思靳惜廉金不肯多延名幕致以人少誤公已昧人臣敬事之義且任學政者不思校士育才而斤斤惟養廉是惜其鄙陋尚可問乎嗣後各省學政務須通曉大體多擇工於閱文

之幕友即極小省分亦不得不及五六人並著各督撫留心稽察如有不肯多延幕友辦理周章者即隨時據實奏聞毋得稍涉徇隱將此通行飭諭知之

裁金山衛學改歸各縣蘇松所屬蘇州太倉鎮海鎮江四衛軍童均已各歸坐落州縣應試其金山衛舊有守備因事簡議裁歸併鎮海衛管理應將該衛學名目裁汰各就生童住址改歸各縣考試將取進原額查明各生童居住各縣人數多寡均

勻分撥歲科兩考照蘇太等衛之例於冊卷填明
衛籍字樣其已進之廩增附生俱撥歸住居之縣
學教官就近管束嗣後每屆四年編審時將屯軍
勲軍滋生新丁一體編查造報臨期考試各該縣
按冊較對如有不敷即行剔除查究仍責成衛廩
生認保畫結如無衛廩生之縣准衛籍增附生互
相認識保送

又議准江西定南縣改為定南廳所屬訓導并文

武學額仍循舊例

三十九年增海寧州廩貢額缺浙江海寧縣改為
海寧州安吉州改為安吉縣入學額數仍循舊例
至廩生額缺海寧應改為三十名三年兩貢安吉
改為二十名兩年一貢以符州縣體制現在安吉
多補廩生十名應俟陸續缺出改歸海寧補數
是年改撥安西淵泉廩增額缺安西府改為直隸
州併裁汰淵泉縣府縣兩學原設廩生各二名前

經題准撥歸新改州學其原設增缺亦應一體撥入州學幫補現在廩增各生本隸淵泉者撥入州學即以實廩實增註冊其籍隸玉門等處者改歸原籍各學應作為候廩候增遇縣學有缺新舊間補至現在取進鎮西府屬童生暫發宜禾縣督課俟該督題定後再為分撥

又改定迪化等州縣學額迪化州改為直隸州寧邊州同改為昌吉縣其所設學額歲科兩試准其

各取進文章四名歲試取進武童四名令陝西學政按臨肅州之前將題目密送巴里坤道嚴行局試仍將試卷封送學政按額取進再迪化州改為直隸州寧邊州同改為昌吉縣已不由鎮西府管轄其文武生童無撥府之例應將該州縣應試童生照額取進各歸本學收管毋庸酌撥府學

又增減福建屏南古田學額文武入學額數以八名留古田八名歸屏南廩增各二十缺亦均分兩

學嗣因屏南童生稀少復議准古田童生報名寄考謂之寄屏取進四名其屏南本籍童生謂之正屏亦取進四名廩增十缺各半分撥但正寄相雜恐滋冒考之弊應將寄屏進額四名撥歸古田縣准其歲科兩試各取進十二名廩增各十五名屏南縣取進四名廩增各五名俱作為定額刪去正寄字樣再古田二縣廩生從前照分學之例兩縣輪流二年一貢今既分隸各學所有古田縣廩缺

較多應改為三年兩貢其屏南廩生五缺照該省小學例定為四年一貢

又議准蘇州府學增生李秉德於乾隆三十年

聖駕南巡時獻畫考取進京在

內廷行走經前院以遊學註冊欠考三次該生現在丁憂回籍又難補考若照例除名則該生實屬辨公與尋常遊學欠考者不同應於學冊內註明因公欠考字樣俟服闋後再行補考

又議准向例生員已成痼疾及年屆七旬者准給
衣頂免其補考其欠考數次並未載明但此項病
廢生員與有心規避者有間其廢病日久既不能
希冀痊愈雖欠考二三次尚非託詞展限可比應
照例准給衣頂免其補考

四十一年熱河地方設立義學每廳一處延請品
學兼優之士分司訓課

是年

上東巡

諭朕因兩金川耆定恭奉

慈輦東巡修在泮獻功之典首自近畿單數愷澤膠庠樂育並宜一體加恩著將直隸本年入學名數大學增額五名中學增額四名小學增額三名該學政其悉心校錄甄拔殊尤副朕加惠士林至意

又

諭兩金川現已勸平獻俘奏凱稽典東巡告功在泮業

已恩施疊沛慶洽羣黎更念齊魯諸生戶盈弦誦地
切近光當此武功大定之時更宜加惠膠庠式敷教
澤所有山東省本年入學名數大學著增額五名中
學增額四名小學增額三名該學政其悉心蒐錄遴
拔真才副朕樂育人材至意

定安徽衛籍丁童歸各土著州縣報名收考管束
先是江蘇等省衛所軍童各歸坐落州縣收考今
安徽衛籍丁童亦由各土著州縣收考但不論離

衛遠近由衛報明移送各州縣丁童考試既歸各州縣不便於臨考之前復令其赴衛報名應令各衛將本管軍籍預行造具戶口印冊移送土著州縣存案至考試屆期即令各本童徑赴州縣報名填註衛籍字樣該州縣按照本衛原冊詳細核對如有本童隱匿衛籍及廩保扶同出結者照例治罪至取進衛童均撥入本州縣學以便管束毋庸撥入府學其從前由衛錄取之廩增附生亦令填

明衛籍改歸各土著州縣學冊

諭朕每歲木蘭秋獮先期駐蹕熱河數十年來見該處
戶口日增民生富庶且農耕蕃殖市肆殷闐儼然成
一都會惟弦誦之風未盛由於口外人多樸魯無所
師承且未立學額更無以示鼓舞因思熱河各廳所
屬編氓及僑居年久者其子弟應不乏秀良誠能教
育而振興之未嘗不足以示造就自宜勅設義學延
師訓課以勵文風并當建立學宮酌定庠額俾得藉

以上進其如何興建籌辦各事宜著該督周元理悉心勘議具奏至學校章程并著會同學政羅源漢酌議奏聞副朕嘉惠塞民廣學毓材至意嗣據議准歲科二考熱河一廳每試取進文童四名其餘六廳各取進文童二名如佳卷不敷寧缺無濫歲考武童減半取進額定廩增各十六名以開考之年計算俟十二年後始行出貢照例三年挨貢一名遇拔貢之年拔取一名

又熱河本無土著凡流寓民人身家清白寄籍二
十年者俱准考試各廳查明申道轉送學政考取
入學其有現在口外居住業於密雲等處入學者
准其報明改歸熱河學冊其中有現係廩生應即
令其各保本廳童生如該廳現無改歸廩生飭取
地鄰保結俟該處補有廩生仍照例令廩生保結
又熱河生童從前歸併密雲縣學歷年俱赴通州
考棚應試今七廳生童仍赴通州應試毋庸另建

考棚俟將來人數日增再行酌量添建其鄉試之年一體編入北貝字號取中

御製熱河

文廟碑記

丙申夏駐蹕熱河避暑山莊曹秀先以禮部尚書扈從幾暇召見談及時政秀先云臣春卿也在職言職以為此處宜興學校以造就士朕曰俞哉亦其時矣於是乎有設學之旨於是乎有加額之恩學校既設

則

文廟亟宜建乃命相地伐材卜吉鳩工宮牆泮水殿廡
禮樂一如制越二年己亥夏朕以來巡親

釋奠而落成之夫熱河固自古闔塞以外荒畧之區也
雖金遼有興州之稱然旋舉旋廢建置沿革率不可
考而況有臯比之傳絃誦之聲哉是以我

皇祖每年避暑於此亦不過名之曰山莊故有
聚民至萬家之句蓋於禮樂之興未免

存待以百年之意今則耕桑日以闢戶口日以滋幅員計之不啻數千里而版籍或逾十萬焉此而無學校以牖民迪俗豈宣

祖猷揚

聖化之道且今西域烏魯木齊等處率置郡縣立學校以此較彼為尤近矣則茲

文廟之建於時於地胥不可緩亦不待人之請而後行稱之曰熱河

文廟者今雖升之曰承德府從其朔紀其因也昔蘓軾
作韓愈碑記云公之神之在天下如水之在地中予
謂韓愈因文見道哉

夫子體道垂文韓愈之所因者即

夫子之所垂而見猶待乎行體則其本也且水在地中
尚需求而得之我

夫子乃天之經地之義山之峙海之淵無日不在人人
心目之中範圍曲成而不遺豈待穿鑿求之而後得

然則

本鐸之音孰謂不可覺斯民於闕外荒畧之區也哉

又設立仁懷廳學仁懷縣改設直隸同知專設學
校其入學額數於遵義府仁懷縣兩學進額內各
撥二名定為廳學四名並將遵義府仁懷縣額設
廩增缺內各撥四名定為廳學廩生八名增生八
名至出貢年分照永豐州等學之例四年挨貢一
名俟十二年後選拔之期拔取一名如無文行兼

優之士照例寧缺毋濫

又設立水城廳學時以平遠州所轄之時豐歲稔
崇信三里撥歸水城通判管轄該廳舊轄二里額
定進學二名附入大定府學平遠州舊轄九里額
進十五名今以三里裁歸廳學亦應裁去州額三
名即於該廳所轄五里內定為額進五名附入府
學嗣於乾隆四十二年議准平遠州廩增各撥六
名作為水城廳額缺歸入大定府學

又更定兩淮商籍額數時以兩淮商籍額多人少不應仍照原額取進亦不便以商竈之額攤入民額致啟混淆酌定商竈每十名各取進一名其尾零過半者亦准取一名照例附入揚州府學嗣後商竈倘人文復盛仍於原額內通計酌取總不得過原額二十名之數以示限制仍令該學政每屆考竣之期開造清冊並將商竈應試各若干名即於文內聲明呈送禮部查核如考試童生雖與取

進額數相符而佳卷不敷寧缺毋濫

山東省增撥濟寧臨清二直隸州學額時以兗州
東昌二府分出濟寧臨清二直隸州并州屬各縣
應於兗州府學額內以二名撥入濟寧州東昌府
學額內以二名撥入臨清州其廩增生員與各本
州縣生員照考案先後挨次間補較其食糧年分
一體出貢其歲科兩試文武童生由本州考取徑
送學院考試濟寧州屬之汶上平等三縣臨清州屬

之武城等三縣各文武童生由縣考定送州覆考
轉送學院按試錄取並於各該州城另建考棚其
未建考棚之先暫附兗州東昌二府考棚應試

甘肅省設立奇台阜康二縣學時以甘肅特納格
爾等處改設奇台阜康二縣專設學額歲科兩試
奇台阜康二縣各取進文章四名歲試取進武童
四名奇台縣係鎮西府管轄應照內地之例撥入
府學文章一名武童一名奇台與宜禾縣並隸鎮

西府定撥府學額三名其阜康縣係直隸迪化州
管轄取進文武生童各歸本學收管毋庸酌撥府
學學政按臨肅州之前將考試文武生童題目密
送鎮西府并巴里坤道嚴密局試封送學政按額
取進如試卷不能足額照例寧缺無濫其武童外
場亦由該府會同巴里坤鎮考試照例辦理

四十二年禮部議准雅州府科歲連考四川雅州
一府生童往返險阻該學政咨請歲科連考准為

卷七十二

定例

又議准各省廩生按照年分挨次出貢其平時有無緣事戒飭之案原應分別核辦應行令各省學政嗣後廩生內有詞訟牽連經地方官審明申詳督撫發學戒飭者即將該生出貢之處扣除註冊仍將原案呈報禮部查核

四十三年申嚴地方官子弟親族冒占商籍并裁併各省商籍設立鹵字號各事宜先是四十三年

因紹興府通判張廷泰引

見奉

旨飭令冒籍人員自行呈明改歸本籍毋許隱匿不報
嗣後倘有牽混入籍不准再請改歸照例斥革治罪
嗣有潘鷺杭光晉俱籍隸浙江均係現任濟寧州
知州藍應桂之婿冒占山東運籍入學中式後又
不遵例改歸仍以山東商籍赴京會試實屬顯違
例禁應行斥革仍照違制例杖一百再定例現任

官員令子弟冒籍者革職監應桂現任山東官員
明知伊婿等冒籍並不禁阻又不勸令改歸實屬
瞻顧親誼應請

旨革職潘鷺之父潘汝誠曾任山東濮州知州潘鷺入
學乃不令據實呈報改歸應交部議處嗣後凡有
商籍省分之各督撫學政飭屬嚴查商籍內有本
省現任地方官之子弟親族在彼冒籍者除本人
斥革外將該員查叅革職其已經離任後尚有子

弟親族在彼冒籍者查明斥革仍將該員議處至並
無父兄在該省居官僅有商人招引冒籍者俱著
自行呈報改歸如敢隱匿查出斥革查辦之後仍
有冒籍別經發覺者原查之督撫學政及該管各
官交部議處嗣後止許領有鹽引合例官商之親子
弟姪應考併於結內三代下註明現行何地引鹽
及住居地方以憑查核倘不敷學額寧缺無濫奉
旨監應桂僅予革職尚不足以蔽辜著發往軍臺効力

贖罪又是年續經御史戈源叅奏孫履謙原籍常州陽湖縣人入籍宛平縣進學中式本年二月到京場期已迫未及呈改仍以順天籍中式進士孫履謙雖無父兄戚屬在順天居官較潘鷺杭光晉有間但並不遵例改歸朦混應試顯違例禁未便照自行呈明之吳煥胡秀森辨理應全行斥革以示懲儆

皇上詣

盛京恭謁

祖陵將

盛京滿合二號及奉天所屬各學科考廣額一次其
向取進六名以上者增額三名四五名者增額二
名二三名者增額一名

禮部議覆直隸總督周元理奏長蘆商籍歷年應
試文章不過二十七八名武童十六七名計十名
取進一名文章定額三名武童定額二名又商籍

生員每科五十餘名應照從前另編鹵字號五十名取中一名人數雖多不得過二名之額不及五十名不准取中至順天鄉試房考閱卷有南北互相迴避之例應交該督將鹵字號應試者預查原籍咨報順天府臨場令內簾迴避併造冊送部以憑磨勘時查核至竈籍一項住居已久與土著無異應照舊歸入北貝字號應試

又議覆山西巡撫覺羅巴延三奏山西運學舊額

進二十名雍正九年減去八名額進十二名茲據
奏山西有坐商運商二項坐商置有畦地鉅粟澆
曬鹽觔本年文童一百九十七名內籍隸朝邑及
解州平陸等縣者僅十一名籍隸安邑者一百八
十六名若非專設運學則此項坐商當全歸安邑
勢必多佔民額其運商係本省殷戶出資轉運共
五十五名其中兼置畦地者五十二名未置畦地
者止餘三人向係附運報考應仍一體附考俟五

年更換後移回本籍運學進額酌減二名取進十
名武童酌減八名取進四名鄉試毋庸另編鹵字
號

四十四年奉

上諭熱河自

皇祖建立山莊以來迄今六十餘年戶口日滋耕桑益闢
儼然一大都會禮樂百年而後興此正其時曾於丙
申秋降旨添設學校書院加廣庠額以教育而振興

之並相地鳩工建立

文廟茲鑾輅來巡適屆落成親詣行

釋奠禮宮庠泮水間青袍環列彬彬雅可觀從此文化益

當蒸蒸日盛第現在庠生已有五十餘人均應與順

天鄉試雖丁酉科曾經中式一人但邊外士子撲魯

者多恐尚未能與通省貝字號卷校藝獲售著加恩

照宣化府之例另編承字號每科鄉試取中舉人一

名俾士子知上進有階愈加鼓舞俟將來文風漸盛

人數多至百餘名該督臣學臣再行奏聞增額以示
嘉惠上塞士林多方樂育至意

御製文廟釋奠禮成有述

聖祖於斯避暑曾養恬樂利被黎蒸閭閻此日較前盛禮
樂百年以後興爰建

廟堂欣慶落載因釋奠仰依憑菁莪雅化提影響已有
庠間俊秀升

禮部尚書曹秀先奏請

頒發

熱河學宮書籍

聖祖詩文全集

世宗詩文全集

皇上御製文初集

御製詩初二三集及

武英殿刊刻

御纂

欽定書籍詩賦時義各編照直省學校之例一體

頒發送至

熱河貯

文廟之尊經閣從之

又議覆江蘇巡撫楊魁奏本年商籍報考人數合
例者止有張鑄一名請將學額酌留四名仍照童
生十名取進一名之例以為定制不及十名之數
停其收考其鄉試之人每科多則十二三名少則

六七名不敷另編鹵字號請併入民卷取中所有
兩淮商學應行裁汰此後如果人文日盛該撫等
不妨隨時據實查奏再行設額其鄉試現在人少
此後缺額既裁自不能另編鹵字號取中有願改
歸本籍者准其改歸其與入籍之例相符者准其
在江南入籍又竈籍童生與土著無異請改歸民
籍應將該省竈籍學額六名裁汰歸各州縣民籍
考試

又議覆山東巡撫國泰奏東省商籍文武原額各進八名今奉新例本省商人改歸本籍人數較前愈少請額減一半各進四名如不敷取數寧缺無濫等語查商學進額亦須約計人數核實辦理若不查明槩為減半恐原額本多議減尚少嗣後交該撫等查明實數以十名取進一名如果有四十名方准取進四名即人數再多不得過額入學後另編函字號鄉試如中額不敷有願改回本籍者

遵照原奏辦理

又議覆陝甘總督勒爾謹奏甘省寧夏府商學額
進文武各八名該府地處邊隅向係平涼慶陽二
府屬及寧夏屬五州縣人合夥充商並無外省承
充之人間有一二山西陝西人幫辦鹽務俱係三
府屬商人出結一同應考毋庸另設學額應將寧
夏商學裁汰均令改歸原籍

又議准署理兩廣總督李質穎奏粵省向編立國

字號雖數百人止取中一人現在別省真商子弟
姪存粵應考者七八十人應酌定進額七名如人
數不敷寧缺無濫鄉試另設鹵字號於民籍外另
設中額如人數不敷不准取中亦無庸併入民卷
其有情願改回本籍者聽

浙江巡撫王亶望奏請將浙省商籍學額五十名
全行裁汰

諭浙省商籍與長蘆山東情形不同該省人文本盛應

試人多本地之人籍商籍登進者十居七八其中人材輩出頗有用至大僚者是浙省商籍即仁錢士子進身之一途朕所素知若一旦全行裁汰名為嚴核商籍童生實則暗減杭城學額寒畯不免有向隅之歎況商籍所以清釐者原因該省地方官或私令子弟至親冒名入籍以冀倖進實為積弊不可不嚴查究治此外如實係冒濫者有犯必懲其餘則不必因噎廢食預申厲禁朕從不為已甚之事何必獨於此加

嚴以抑士氣乎且浙江商籍學額相沿已久向亦未聞其有弊竟可毋庸更張朕以為浙江商籍學額竟可仍舊辦理但令該撫等隨時查察勿使有倖濫等弊足矣尋九卿議奏浙省商學向撥杭府仁錢三學凡廩增出貢中式即佔仁錢之額其中人材輩出誠如

聖諭與長蘆山東情形不同未便議請裁汰應遵

旨照舊辦理其現在行鹽及商人後裔一併收考至商

籍各生既入杭府仁錢三學即與民籍無異鄉試
照舊散入民卷取中不必另編函字號得

旨允行

臣等謹按各省商籍俱從酌量減額裁併惟浙江
商籍欽奉

恩旨照舊辦理所以嘉惠浙省士子者至矣

四十五年

上南巡增廣江蘇安徽浙江三省學額一次大學加取

五名中學加取四名小學加取三名

四十七年

諭朕稽古右文究心典籍近來命儒臣編輯四庫全書
特建文淵文溯文源文津四閣以資藏庋現在繕寫
頭分告竣其二三四分限於六年內按期歲事所以
嘉惠藝林垂示萬世典至鉅也因思江浙為人文淵
藪朕翠華臨蒞士子涵濡教澤樂育漸摩已非一日
其間力學好古之士願讀中秘書者自不乏人茲四

庫全書允宜廣布流傳以光文治如揚州大觀堂之
文匯閣鎮江金山寺之文宗閣杭州聖因寺行宮之
文瀾閣皆有藏書之所著交四庫館再繕寫全書三
分安置各該處俾江浙士子得以就近觀摩謄錄用
昭我國家藏書美富教思無窮之盛軌

臣等謹按

國家文治覃敷士敦實學我

皇上幾餘念典

特命儒臣編輯四庫全書建文淵文溯文源文津四閣
以資藏度又以江浙為人文淵藪

復命繕寫全書三分於揚州大觀堂之文匯閣鎮江金
山寺之文宗閣杭州聖因寺

行宮之文瀾閣各貯一分俾士子得以就近觀摩以照
嘉惠藝林之至意此誠千古以來文教之隆未有
如

今日者也臣等謹於學校門恭載

諭旨以見

皇上稽古右文之盛至於採訪遺書及全書目錄俱詳載經籍門焉

四十八年

皇上詣

盛京恭謁

祖陵

盛京滿合二號及奉天所屬各學歲考廣額一次其

向取進六名以上者增額三名四五名者增額二
名二三名者增額一名

定順天府四路二十二州縣照大宛兩縣例歸府
丞考試向例順天府所屬各州縣童生於該州縣
考試錄取後大興宛平二縣則由順天府丞考試
其餘各州縣則由四路同知各按所管於駐劄地
方考試至是尚書兼管府尹胡季堂奏稱該同知
各處衝要之地遇有要事公出往往稽遲試期所

有四路二十二州縣請一體責令府丞考試令各屬童生即赴通州考棚該府丞尅期前往就棚考試至府丞試畢正屆學政考期士子即於該處應試既無似從前先赴各路府考又赴通州院考往返道路之煩而該處原有考棚無庸另為籌辦亦與保定等府體制畫一從之

諭盛京為本朝根本重地兵丁皆知恪守舊風嫻騎射以裕武備現亦校閱分別賞賚其讀書之士亦漸摩

文化蒸蒸日上盛堪與畿甸比隆朕鑒輅所臨青衿獻
詩趨迓絃誦彬彬且見膠庠樂育自宜一體加恩用
彰作人盛典著將盛京滿合二號及奉天所屬各學
歲考廣額一次其 取進六名以上者增額三名四
五名者增額二名二三名者增額一名該府丞其悉
心校錄甄拔殊尤副朕加惠士林至意

四十九年

上南巡增廣江蘇安徽浙江三省學額一次大學增取

五名中學增取四名小學增取三名

五十年酌定隨棚投考出貢事宜大學士九卿議
奏湖南學政錢澧奏稱嗣後考貢概令無須遠出
歲科兩試各就本棚投考除本年考本年者無論
外其有下年始輪應貢而計下年按臨不復至者
准其預考有本年應貢而本年按臨不及者准俟
下年補考給發貢照時仍按應貢本年填註報部
應如該學政所奏辦理惟學政按臨一屬不過匝

月該生等難保無患病事故致悞本棚考試應仍
准其隨棚投考以示體恤但須明立限期無論預
考補考均以學政按臨之期定限一年違者不准
出貢至該學政奏稱永順一府最為寫遠例歲科
兼試二年一貢通計六年三貢前後按臨兩次則
此次一貢下次兩貢亦係酌量變通之意應如所
奏辦理各省有歲科並考之處其出貢年分不一
應令各該學政就該省所屬道里遠近酌量核定

報明禮部存案得

旨允行

是年增減湖南鳳凰乾州等廳學額大學士九卿
議覆辰州府屬之鳳凰乾州三廳量為酌改學額
請將鳳凰廳原額八名減去二名仍留六名永綏
乾州二廳原額各八名各減去四名仍留四名其
武童取入名額亦照此數至所減各額請照該省
苗疆新童之例於鳳凰廳所減漢童二名改設新

童二名永綏乾州二廳各減四名亦各改設新童
二名仍照例寧缺無濫衡州府附郭之衡陽清泉
二縣又風久為出色而入學名數較少請將永綏
乾州二廳所減學額二名撥增衡陽清泉二縣各
取進文童十二名又請衡陽清泉二縣遇選拔之
年於二縣內酌取一人今二縣實有讀書上進之
士請將共拔一人之例量為酌變得

旨大學士九卿議覆學政錢澧酌定苗疆學額內衡陽

清泉二縣遇選拔之年仍照舊例於二學內酌取一名但念該省為民苗雜處之地而衡陽清泉二學既據該學政奏稱烟戶錢糧稍多且文風較為出色自應隨時量為酌變著照所請准其於選拔之期各拔一名以示鼓勵

陝甘總督福康安烏嚕木齊都統奎林奏請巴里坤自三十八年設學以來因道途遙遠學政將試題密封發往考試從前責成該處道員辦理後改

歸府嗣於四十四年前任總督會題統歸烏魯木
齊都統局試俱於考後將試卷密送學政按額錄
取鎮西府屬生童自改歸烏魯木齊都統局試之
後歲科兩試往返長途資斧不繼並有因此不能
赴試者請仍復舊制將鎮西府宜禾奇台二縣生童
就近歸府局試從之

皇朝文獻通考卷七十二